



E Mucha Malcomprendi

Ami ta e mucha cu ta mustra sano y bon.
Mi a nace cu diez dede na pia y man.
Pero tin algo diferente, algun caminda den mi mente,
Y kiko e ta, niun hende no sa.

Ami ta e mucha cu ta pasa duro na scol,
Juffrouw ta bisa mi por siña masha bon.
Nan ta yama'mi pa 'floho' y mi mester por sa,
Pero e cos ta, min'sa unda pa cuminsa.

Ami ta e mucha cu no kier bisti e flanel ey
Pasobra e ta molestia.
Mi no por wanta cierto zonido ni holor,
Y tin cuminda mi no kier ni wak!

Ami ta e mucha cu no por catch e bala
Y mi ta cay lihe,
Muchanan ta kies mi delaster pa nan team
Para eynan ta warda, nan no sa cu mi ta sinti'e?

Ami ta e mucha cu nan no kier hunga cun'e.
Esun cu nan ta tenta.
Mi ta purba hasi mescos cu nan,
Mi por imita.
Loke mi ta hasi fout, mi no sa.

Ami ta e mucha cu ta grita y sapatia,
Mi ta parse "malamucha".
Bo nunca lo sa con e panico paden ta.
Ora mi perde den mi miedo y ta rabia.

Ami ta e mucha cu ta mishi rond y cana bay.
Nan ta bisami sinta keto y hasi bon.
Mi lo hasi'e si mi tabata por....
Bo ta kere mi a kies pa ta foi control?

Ami ta e mucha cu curason kibra,
Maske ta parse cu no ta importa.
Ami ta e mucha cu mester wordo stima,
Tambe acepta y valora.

Mi ta e mucha malcomprendi,
Diferente, pero mescos cu bo mi ta!
(Traduci & Adapta for di "The Misunderstood Child" di Kathy Winters)